

Bulletin 08-01-2025

### आकाशवाणी

- प्रधानमंत्री नरेंद्र मोदी होरें अज्ज संज्ञा आंध्र प्रदेश दे विशाखापत्तनम च 2 लक्ख करोड़ रपे शा मते दिएं परियोजनाएं दा उद्घाटन ते शिलान्यास कीता।
- 18मां प्रवासी भारतीय सम्मेलन अज्ज ओडिशा दे भुवनेश्वर च शुरू होआ, विदेश मंत्री होरें भारत दे विकास च नौजवानें दे योगदान दी सराहना कीती।
- रक्षा मंत्री राजनाथ सिंह होरें अज्ज नमीं दिल्ली च मालदीव्ज दे महरूतबा कन्नै दपक्खी बैठक लाई ते सुरक्षा सहयोग सरबंधी बक्ख-बक्ख विषें पर गल्लबात कीती।
- इक राष्ट्र इक चुनांऽ कन्नै सरबंधत दऊं विधेयकें पर संयुक्त संसदीय समिति दी अज्ज पैहली बैठक लग्गी।
- राष्ट्रपति द्रौपदी मुर्मू होर कल्लै थमां मेघालय ते ओडिशा दे दौरे पर जा'रदियां ना।
- सूचना ते प्रसारण मंत्री अश्विनी वैशणव होरें अज्ज महाकुम्भ 2025 गी समर्पित आकाशवाणी ते दूरदर्शन दा विशेष गीत जारी कीता।
- भारत दे शीर्ष बैडमिंटन खडारी एच.एस प्रणय मलेशिया ओपन दे मर्दे दे इक्कले-इक्कले मकाबले दे प्री क्वाटर फाइनल च पुज्जी गेन।

<><><><><><>

### PM-Andhra Pradesh

प्रधानमंत्री नरेन्द्र मोदी होरें अज्ज आंध्र प्रदेश दे विशाखापत्तनम च 2 लक्ख करोड़ रपें शा मते दी परियोजनाएं दा लोकार्पण ते शुभारंभ करडन ते केई परियोजनाएं दा नींह पत्थर रक्खेआ। उनें विशाखापत्तनम दे नेडे पुदिमदका च एनटीपीसी ग्रीन एनर्जी लिमिटेड दी भलेआं अज्जै-कल्लै दी हरित हाईड्रोजन केंद्र परियोजना दा नींह पत्थर रक्खेआ। एह राष्ट्री हरित हाईड्रोजन मिशन दे तैहत पैहला हरित हाईड्रोजन केंद्र होग। इस परियोजना पर तकरीबन 1 लक्ख 85 ज्हार करोड़ रपें दा निवेश होग। प्रधानमंत्री होर आंध्र प्रदेश च 19 ज्हार 500 करोड़ रपें शा मते दी रेल ते सिडक परियोजनाएं दा बी नींह पत्थर रक्खडन ते केई परियोजनाएं दा शुभारंभ करडन। हुनै कोल किश चिर पैहले अपने संबोधनै च मोदी होरें आखेआ जे एह परियोजना आंध्र प्रदेश गी तरक्की दी बत्तै पर दूर अगड़े लेई जाने च मती महत्वै आहिलयां साबत होंगन।

<><><><><><>

### Pravasi Bhartiya Divas

18मां प्रवासी भारतीय दिवस सम्मेलन अज्ज बडुलै ओडिशा दे भुवनेश्वर च शुरू होआ। एहदे च 75 मुलखें थमां आए दे करीब 6 ज्हार प्रवासी भारतीय हिस्सा लै करदे ना। युवा प्रवासी भारतीय दिवस दे उद्घाटन समारोह दौरान बोलदे होई विदेश मंत्री डॉ. एस जयशंकर होरें आखेआ जे इक्क आधुनिक, समग्र ते प्रगतिशील समाज दे निर्माण च मते चिरें थमां पेश आवै करदी चुनौतिएं दा हल कडुने दी दिशा च भारत तेजिया कन्नै अगड़ा बधा करदा ऐ। जयशंकर होरें नौजवानें आसेआ आलमी सतह पर

कीती गेदी महत्वपूर्ण पैहलकदमियें जियां आर्टिफिशल इंटेलीजेंस, स्टार्ट अप, अंतरिक्ष दी खोज ते ड्रोन वगैरा दे विकास पर लौऽ पाई। उनें जोर देइयै आखेआ जे भारत गी विकसित राष्ट्र बनाने दी जिम्मेदारी च नौजवानें गी महत्वपूर्ण भूमिका निभानी होग ते भविष्य दिएं पीढ़िएं गी समाज दी तरक्की गै अगगे आइयै अपने हथें आकार देना होग। प्रधानमंत्री नरेंद्र मोदी होर कल औपचारिक तौर पर इस कार्यक्रम दा उद्घाटन करंगन।

राष्ट्रपति द्रौपदी मुर्मु होर शुक्रवारें समापन सत्र दी अध्यक्षता करडन। ओह बक्ख-बक्ख खेत्तरें च प्रवासी भारतीयें दी उपलब्धियें आस्तै उनेंगी प्रवासी भारती सम्मान बी भेंट करडन।

<><><><><><>

### Gadkari-Accident Victims

सड़क, ट्रांसपोर्ट ते जरनैली शिडकें सरबन्धी केंद्री मंत्री नितिन गडकरी होरें आखेआ ऐ जे 2024 च सड़क हादसे च कोई 1 लक्ख 80 ज्हार लोकें दी मौत होई ऐ। नमीं दिल्ली च सब्बनें राज्यें ते केंद्र शासित प्रदेशें दे ट्रांसपोर्ट मनिस्टरें कन्नै लग्गी दी सड़क सुरक्षा बारै इक बैठक दे बाद प्रेस कांफ्रेंस च मंत्री होरें दस्सेआ जे हेलमेट नेही पाने कारण कोई 30 ज्हार लोकें दी जान गई ऐ। उनें आखेआ जे 66 प्रतिशत मौतां 18 कोला लेइयै 34 बरे तोड़ी दी उम्री दे लोकें दी होई ऐ। उनें आखेआ जे तोआई केंद्री मंत्री होरें कैशलैस ट्रीटमेंट नां दी इक स्कीम दी शुरूआत कीती जेदे च सड़क हादसें दे पीड़ितें गी हादसे दे 24 घंटे दे अंदर-अंदर डेढ लक्ख रपे तगर दी सहायता उपलब्ध कराने दी पेशकश ऐ। इस स्कीम तैहत पीड़ित गी डेढ लक्ख रपे ते गड्डी मारियै नस्सी जाने आहले मामले च मारे जाने आहले दे परिवार गी 2 लक्ख रपे देने दी बवस्था ऐ।

<><><><><><>

### Gadkari

केंद्रीय शिडक ते यातायात ते राष्ट्रीय जरनैली शिडकें सरबन्धी मंत्री नितिन गडकरी होरें नमी कैशलैस ट्रीटमेंट स्कीम दी शुरूआत कीती ऐ। एदे राए हादसे करी प्रभावित लोकें गी फौरी तौर पर मदद दिती जाग। इस स्कीम तैहत पीड़ित गी डेढ लक्ख रपे तगर दी राशी हादसे दे 24 घंटे दे अन्दर अन्दर दिती जाग ते 2 लक्ख रपे दी राशी मारिए नस्सी जाने आले मामले च पीड़ित गी उपलब्ध करोआई जाग।

<><><><><><>

### US-India

अमरीका दे वर्जीनिया दी विधायका लेई विशेष चुनाएं च भारतीय मूल दे कन्नन श्रीनिवासन होरें गी अज्ज स्टेट सिनेट ते जे.जे सिंह होरें गी स्टेट हाउस ऑफ डेलीगेट्स लेई चुनी लैता गेआ ऐ। श्रीनिवासन होर एहदे शा पैहले 2023 च वर्जीनिया हाउस लेई चुने गे हे ते जे.जे सिंह होरें साबका राष्ट्रपति बराक ओबामा हुंदे मतैहत व्हाईट हाउस च मैनेजमेंट एंड वजट सीगे च कम्म कीते दा ऐ।

<><><><><><>

## Rajnath-Maldives

रक्षा मंत्री राजनाथ सिंह ते मालदीव दे रक्षा मंत्री मोहम्मद घासन मौनून होरें अज्ज नमीं दिल्ली च दपक्खी बैठक कीती। दौनें मंत्रिणं सिखलाई, सैन्य भ्यास ते रक्षा परियोजनाएं सने दपक्खी रक्षा सहयोग सरबंधी बक्ख-बक्ख मुद्दे दी समीक्षा कीती। इक सोशल मीडिया पोस्ट च राजनाथ सिंह होरें दस्सेआ जे गल्लबात बड़ी सार्थक रेही ते एहदे नै भारत ते मालदीव दे सरबंधें गी नमीं उर्जा थहोग। उनें आखेआ जे रक्षा सहयोग गी होर निगगर बनाने दे नेकें मुद्दे पर गल्लबात होई जेडे मालदीव दे राश्ट्री सुरक्षा बले दी छमता बधाने च मदद करोग।

<><><><><><>

## India-EU

भारत ते यूरोपीय संध दी मनुक्खी अधिकारें सरबंधी 11मीं गल्लबात अज्ज नमीं दिल्ली च लग्गी जेदी अध्यक्षता विदेश मंत्रालय च संयुक्त सचिव पीयूष श्रीवास्तव ते भारत च यूरोपी संघ दे राजदूत हर्वे डेलिफन होरें सांझे तौरा पर कीती। वार्ता दौरान भारत ते यूरोपी संघ नै लोकतंत्र, सुतंत्रता, कनून ते शासन ते सब्बनें मनुक्खी अधिकारें दे प्रचार ते संरक्षण ते सांझे सिद्धांतें ते मुल्लें कदरें लेई अपने धेइये गी फही पक्का कीता। उनें सब्बनें मनुक्खी अधिकारें दी राखी हिफाजत गी यकीनी बनाने च सहयोग देने दे बक्ख-बक्ख पैहलुएं पर बी चर्चा कीती। दौनें पक्खें माहनू दे नागरिक ते राजनीतिक, समाजिक पक्खें, माहनू दे नागरिक ते राजनीतिक, समाजिक, आर्थिक ते सांस्कृतिक अधिकारें दे संरक्षण ते फर्कोफर्की दे सब्बनें रूपें गी खत्म करने पर बी चर्चा कीती।

<><><><><><>

## Ukraine Drone Attack

यूक्रेनी सेना नै रूस दे सारातोव खेत्तर च बड्डे पैमाने पर ड्रोन हमले कीते। इनें हमलें च इक्क औद्योगिक उद्यम गी नुकसान पुज्जा ऐ। यूक्रेन दी सेना दे जनरल स्टाफ नै आखेआ ऐ जे सेना नै एंगेल्स च एयरबेस गी ईंधन प्रदान करने आहले इक्क रूसी तेल डिपो गी निशाना बनाया ऐ। सारातोव दे गवर्नर रोमन बुसार्गिन होरें आखेआ जे हमले च सारातोव ते एंगेल्स दे पड़ोसी शहरें गी निशाना बनाया गेआ। एह खेत्तर रूसी बम-वर्षक विमानें दा एयरबेस ऐ। रूस दे रक्षा मंत्रालय नै दस्सेआ ऐ जे उन्नै सारातोव खेत्तर च 11 यूक्रेनी ड्रोन नष्ट कीते ना। मंत्रालय नै एह बी दावा कीता ऐ जे उन्नै रोस्तोव, बेलगोरोड, ब्रांस्क ते आजोव सागर पर कुल 21 यूक्रेनी ड्रोन नष्ट कीते ना।

<><><><><><>

## AAP BJP

दिल्ली विधानसभा चुनां कार्यक्रम दी घोषणा दे कन्नै गै राजधानी च राजनीतिक गतिविधियां बल्ले-बल्ले तेज होआ रदियां ना। आम आदमी पार्टी दे राश्ट्रीय संयोजक अरविंद केजरीवाल आसेआ मुख्मंत्रि रौहंदे अपने अधिकारिक आवास पर कथित बेतहाश खर्चे दे मुद्दे पर सत्तारूढ आम आदमी पार्टी ते विपक्षी भाजपा दौनें आमने-सामने ना। इस मुद्दे पर दौनें दलें बश्कार लगातार आरोप-प्रत्यारोप दा दौर जारी ऐ। तोआई राजधानी दिल्ली भाजपा मुख्यालय च अज्ज जनकपुरी ते कृष्णा नगर दे बक्ख-बक्ख आम आदमी पार्टी दे सदस्यें सांसद हर्ष मल्होत्रा दी उपलब्धि च भाजपा दी

सदस्यता ग्रहण कीती। इस मौके पर श्री मल्होत्रा हारें आखेआ जे आम आदमी पार्टी दे कार्यकर्ताएं दा विश्वास पार्टी दे नेताएं पर खत्म होआ ऐ।

<><><><><><>

## JPC-ONOE

इक राष्ट्र इक चुनांऽ कन्नै सरबंधित दऊं विधेयकें पर संयुक्त संसदीय समिति जे.पी.सी दी पैहली बैठक अज्ज नमीं दिल्ली च शुरू होई। इनें दौनें बिलें गी आधिकारिक तौरा पर 129में संविधान संशोधन बिल 2024 ते केंद्र शासित प्रदेश कनून संशोधन बिल 2024 नां दिता गेदा ऐ। नमीं दिल्ली च संवाददाताएं कन्नै गल्ल करदे होई समिति दे अध्यक्ष ते बीजेपी दे सांसद पी.पी चौधरी होरें आखेआ जे समिति सब्भनें हितधारकें दे विचार जानग, भाएं ओहू कनून माहिर होन जां न्यायपालिका दे मिम्बर, सिविल समाज दे प्रतिनिधि जां फही कुसै सियासी पार्टी दे नुमाइंदे। उनें आखेआ जे समिति सब्भनें दे विचार जानने ते उंदे सुझाएं पर गौर करने दे बाद गै अगडे बधने दा फैसला लैग।

<><><><><><>

## President

राष्ट्रपति द्रौपदी मुर्मू होर कल्लै थमां मेघालय ते ओडिशा दे दौरे पर रौहडन। राष्ट्रपति होर मेघालय दे उमियम च आई.सी.ए.आर अनुसंधान परिसर दे स्वर्ण जयंती समारोह च शामिल होडन। 10 जरवरी गी ओहडिशा दे भुवनेश्वर च 18में प्रवासी भारतीय दिवस सम्मेलन दे समापन सत्र च शामिल होंगन ते प्रवासी भारती सम्मान पुरस्कार भेंट करंगन।

<><><><><><>

## Akashvani DD Song

सूचना ते प्रसारण मंत्री अश्विनी वैशणव होरें अज्ज महाकुम्भ 2025 गी समर्पित आकाशवाणी ते दूरदर्शन दे विशेष गीत गी जारी कीता। महाकुम्भ दा आयोजन 13 जनवरी कोला लेइयै 26 फरवरी तगर प्रयागराज च होआ करदा ऐ।

<><><><><><>

## NCC-Republic day Camp

भारतीय ब्हाऊ फौज दे प्रमुख अमरप्रीत सिंह होरें अज्ज नमीं दिल्ली च राष्ट्रीय कैडेट कोर दे गणतंत्र दिवस शिविर च शामिल होए। इस मौके पर उनें आखेआ जे एनसीसी देसै गी इकजुट करने च सराहनेजोग कम्म करा करदी ऐ। उनें आखेआ जे एनसीसी च नौजवानें गी राष्ट्र निर्माण लेई सिखलाई देइयै तैयार कीता जंदा ऐ। उनें आखेआ जे एनसीसी, अनुशासन, निस्वार्थ सेवा, नेतृत्व क्षमता ते देशभक्ति जां जज्बा ते समर्थन विकसित करने च मददगार साबत होंदी ऐ।

<><><><><><>

## Badminton Malaysia Open

ते हून बैडमिंटन। भारत दे शीर्ष बैडमिंटन खडारी एच.एस प्रणय मलेशिया ओपन दे मर्दे दे इक्कले-इक्कले मकाबले दे प्री-क्वार्टर फाइनल च पुज्जी गेन। उनें कनाडा दे ब्रायन यांग गी 21-12, 17-21 ते 21-15 कन्नै हराया। प्री क्वार्टर फाइनल च हून उंदा मकाबला कल चीन दे शी फेंगली कन्नै होंगं एहदे

शा पैहले कल जिसलै प्रणय ते कनाडा दे यांग गी बश्कार मैच चलै करदा हा ते प्रणय 21-12, 6-3 कन्नै अगगे चलै करदा हा तां बरखा दे चलदे कोर्ट दे छतै रा पानी चोन लगी पेआ। किश चिरै लेई खेड्डु रोकेआ गेआउ पर चोआ बंद नेही होआ ते मैच अज्जै लेई अगडे पाई दित्ता गेआ। तोआई, भारत दी मालविका बनसोड बी टूर्नामेंट दे दुए दौर च पुज्जी गेइयां ना। उनें अज्ज दपैहरी होए दे इक मकाबले च मलेशिया दी जिन बी गो गी सिद्दे सैअें च 21-15, 21-16 कन्नै हराया।

<><><><><><>

### CRS-Speed Trial

रेलवे सुरक्षा कमिशनर दिनेश चंद देशवाल हुंदी अगवाई चअज्ज उधमपुर-श्रीनगर-बारामूला रेल लिंक दे कटडा-बनिहाल सेक्शन दा खीरी स्पीड ट्रायल होआ। एहू खीरी स्पीड ट्रायल मुखै दे सब्बनें शा उच्चे अंजी खड्डु रेलवे पुल उप्पर कीता गेआ। तोआई रेलवे सुरक्षा दे कमिशनर होरें कल कटडा-रियासी सेक्शन ट्रैक दे ढांचे दा उत्थे बनी दियें सुरंगें, स्टेशनें ते पुलें दा जायजा लैता हा ते इस बारै संदोख बी जाहिर कीता हा। स्हाढे जिला संवाददाता हुंदी रिपोर्ट मूजब इस ट्रायल दे बाद कमिशनर होर इक रिपोर्ट पेश करडन जेडी कश्मीर तोड़ी रेलवे सेवा पजाने च मार्गदर्शन करोग ते अगगे दी कार्यवाही लेई बी मदाद करोग।

<><><><><><>

### LG JK Contingent

लेफ्टिनेंट गवर्नर मनोज सिन्हा होरें नमीं दिल्ली च आयोजित होने आहले राश्ट्रीय युवा उत्सव लेई जम्मू-कश्मीर दे दस्ते गी अज्ज झंडी दस्सियै रवाना करवाया। राश्ट्रीय युवा उत्सव आहला एहू कार्जक्रम नौजवानें गी बक्ख-बक्ख श्रेणियें जियां लोक-नाच, शायरी, लेख लिखने, चित्रकारी ते संगीत दे खेत्तरें च अपने हुनर दा प्रदर्शन करने लेई इक बड़ा बढिया मंच उपलब्ध करोआंदा ऐ। एल.जी सिन्हा होरें नौजवानें अंदर नेतृत्व कौशल विकसित करने ते नौजवानें गी उंदी रचनात्मकता ते सांस्कृतिक बन-सबन्नता दा प्रदर्शन करने दा मौका उपलब्ध करवाने लेई इस चाल्ली दे कार्जक्रमें दे महत्वै उप्पर जोर दित्ता। उनें प्रतिभागिएं गी आग्रह कीता जे ओहू पूरे म'नै कन्नै जम्मू-कश्मीर दी नुमायंदगी करन ते इस मंच दे राहें अपने हुनर दा लोहा मनवान। एल.जी होरें आखेआ जे अपनी तकदीर आपूं लिखने ते जम्मू-कश्मीर दे भविक्ख गी इक्क नमां आकार देने दी जिम्मेदारी नौजवानें उप्पर ऐ। उनें आखेआ जे एहू उत्सव मुख भरै थमां नौजवानें गी किट्टे इक्कै मंच पर आहनने दा मौका प्रदान करोग।

<><><><><><>